

嘉業堂
叢書

王荊公詩文注

第二冊

王荊公詩集李壁注勘誤補正卷三

吳縣沈欽韓撰

卷二十八

寄題程公關物華樓中吳紀聞英宗卽位召判三司都磨勘司除利州路轉運使江南西路轉運使此詩蓋在其時作輿地紀勝物華樓在東湖之西城上取物華天寶之句以命名一統志物華樓在南昌洗馬池上宋嘉祐中建其址今爲府學射圃

張侍郎示東府新居詩西清詩話云張挾宋史張挾字文裕以戶部侍郎致仕熙寧七年卒

上元從駕至集禧觀次冲卿韻長編熙寧九年正月辛

未幸集禧觀中太一宮燕從臣幸大相國寺御宣德門
召從臣觀鐙是日上雖游幸猶御便坐宣召輔臣入奏
事

次韻陪駕觀鐙燕翼詒謀錄國朝故事上元張鐙太祖
乾德五年正月詔曰上元張鐙舊止三夜今朝廷無事
區宇乂安方當年穀之豐登宜縱士民之行樂其令開
封府更放十七十八兩夜鐙後遂爲例林希野史安石
上元乘馬從駕還棘園中回駕觀百戲相公馬至宣德
左屏將入親事官攢骨朵止之馬勢不止大闢張茂則
叱止之遂目親事官執其馭者而毆之曰相公馬有何
不可茂則曰相公亦人臣也豈可如此得無爲王莽者

平安石訴茂則毆傷其馭上使驗問傷狀安石不樂遂求去長編熙寧六年二月王安石以病謁告彌旬乃求解機務且入對上面還其章安石固求罷上不許曰卿每求罷朕寢食不安朕必有待遇卿不至處且恕朕豈宣德門事否上又召安石子雱再三問勞又令馮京王珪喻旨于是安石復入視事按此出安石所撰日錄恩澤堯尊散在衢淮南繆稱訓聖人之道猶中衢而致尊耶過者斟酌多少不同各得其所宜歐陽修歸田錄國朝之制歲時賜宴多矣自兩制已上皆與惟上元一夕賜中書樞密院雖前兩府見除使相皆不得與也

和蔡樞密南都種山藥法宋史蔡挺字子政宋城人神

宗卽位知渭州進龍圖直學士熙寧五年拜樞密副使
七年冬奏事殿中病作而仆帝親臨賜藥罷爲資政殿
學士判南京留司御史臺此詩之作蓋在判南京時也
史又云挺謫而多知在渭久鬱鬱不自聊寓意詞曲有
玉關人老之歎中使至則使優伶歌之以達于禁掖神
宗愍焉遂有樞密之拜揮麈餘話熙寧中蔡敏肅挺以
樞密直學士帥平涼初冬置酒郡齋偶成喜遷鶯一闋
末段云歲華向晚愁思誰念玉關人老太平也且歡娛
不惜金尊頻倒詞成閒步後園以示其子朦朦寘之袖
中偶遺墜爲應門老卒得之持令筆吏辨之適郡之娼
魁素與筆吏洽因授衣會賜衣襖中使至敏肅開燕娼

尊前執板歌此中使得其本以歸達于禁中宮女輩但見太平也三字爭相傳授歌聲徧掖庭遂徹于宸聽詰其從來乃知敏肅所製裕陵取索紙批出玉關人老朕甚念之樞筦有闕留以待汝以賜敏肅未幾遂拜樞密副使御筆見藏其孫稹家

和蔡副樞賀平戎慶捷

此王韶收復熙河事詳見文集

注公集有百寮賀復熙河表在卷五十六注已佚

東軒筆錄王觀文韶始爲建

昌軍司理參軍時蔡樞密提點江南刑獄一見知其必貴顧待甚厚數年蔡知慶州王調官關中遂謁蔡于慶陽且言將應制科欲知西事本末蔡遂以前後士大夫言及邊事者皆示之其間有向寶議洮河一說王悅

之以爲可行後掌秦州機宜遂乞復洮河故地朝廷命
韶兼管句蕃部自是其謀寢廣欲盡取蘭州鄯廓不數
年克青唐武勝城熙河取洮岷疊宕西團爲熙河一路
由上意不疑所致也案此詩幕府上功連舊伐推本首
謀卽指蔡也

謁曾魯公東軒筆錄曾魯公公亮自嘉祐秉政至熙寧
中尙在中書雖年甚高而精力不衰故臺諫無非之者
惟李復圭以爲不可作詩云老鳳池邊蹲不去餓鳴臺
上噤無聲未幾魯公亦致仕而去

慶門方似漢韋賢宋史曾公亮傳初薦王安石及同輔
政知上方向之陰爲子孫計凡更張庶事一切聽順而

外若不與之者嘗遣子孝寬參其謀至上前略無所異
於是帝益信任安石安石德其助己故引擢孝寬至樞
密以報之此詩韋賢之句謂孝寬也揮塵餘話曾宣靖
之子令綽執事樞密時元豐官制初行肇建東西二府
俾迎宣靖入居虞侍之爲搢紳之美談

案令綽
孝寬字

駕自啟聖還內宋敏求東京記啟聖院本晉護聖營天

福四年宣祖典禁兵太宗誕聖其地太平興國中建爲

寺以奉太宗神御

案齊東野語作六年汴京遺蹟志啟
聖院在大梁門內街北太平興國二

年建雍熙二年成春明退朝錄眞宗令
供奉僧元藹守太宗御容于啟聖院

酬和父祥源觀醺罷見寄長編天禧二年閏四月先是

皇城司言拱聖營之西南自去年營卒有見龜蛇者因

就建眞武祠今泉涌祠側汲之不竭疫癘者飲之多愈
詔卽其地建道宮以祥源爲名士女徒跣奔走瞻拜至
和元年四月祥源觀火二年十二月新修醴泉觀成卽
祥源觀也因火更其名

卷二十九

和楊樂道韻六首宋史楊政字樂道嘉祐中進龍圖閣
直學士復知諫院

御溝夢華錄金水河自京城西南分京索河水築隄從
汴河上用木槽架過從西北水門入京城夾牆遮擁入
大內灌後苑池浦坊巷御街自宣德樓一直南去約闊
二百餘步兩邊乃御廊舊許市人買賣于其間自政和

間官司禁止各安立黑漆杈子路心又安朱漆杈子兩
行中心御道不得人馬行往行人皆在廊下朱杈子之
外杈子裏有甃石甃砌御溝水兩道宣和間盡植蓮荷
近岸植桃李梨杏雜花相間春夏之間望之如繡

用樂道韻呈樂道舍人聖從待制東都事略何郟字聖
從成都人知梓州進天章閣待制入判銀臺司

崇政殿詳定幕次偶題長編嘉祐六年三月御崇政殿
試禮部進士諸科及特奏名進士諸科賜進士王俊民
等一百三十九人及第五十四人同出身諸科一百二
人及第并同出身特奏名進士諸科四十三人同出身
及諸州文學長史地理志宮後有崇政殿閱事之所也

雲麓漫鈔國朝例崇政殿試舉人景福殿考覆自熙寧後以逐殿增置內帑庫屋難以就置幕次遂移于集英殿

詳定試卷夢谿筆談嘉祐中進士奏名訖未御試京師妄傳王俊民爲狀元不知言之所起人亦莫知俊民爲何人及御試王荊公時爲知制誥與天章閣待制楊樂道二人爲詳定官舊制御試舉人設初考官先定等第復彌之以送覆考官再定等第乃付詳定官發初考官所定等以對覆考之等如同卽已不同則詳其程文當從初考或從覆考卽不得別立等是時王荊公以初覆考所定第一人皆未允當於行間別取一人爲狀首樂

道守法以爲不可議論未決太常少卿朱從道時爲封
彌官聞之謂同舍曰二公何用力爭從道十日前已聞
王俊民爲狀元事必前定二公恨自苦耳旣而二人各
以己意進稟而詔從王荆公之請及發封乃王俊民也
詳定官得別立等自此始遂爲定例羣書考索後集祥
符元年三月上御崇政殿親試進士命翰林李宗諤等
八人爲考官直史館張復等八人爲覆考官侍御周師
望等二人餽名給事中張秉知制誥周起詳定等第天
禧三年三月工部郎中陳堯佐右正言陳執中並奪一
官監茶場酒稅初上累定考試條制舉人納試卽先付
編排官去其卷首鄉貫狀以號第之封彌官騰寫校勘

始付考官定等訖復封彌送覆考官再定等乃送詳定官閱其同異著定始付編排官取鄉貫狀字號合之卽第其姓名差次并試卷以聞遂臨軒放榜焉而堯佐執中爲編排官不詳此制復改易其等級內廷覆驗多所同異遂悉付中書仍召堯佐執中洎考校詳定官對辨之堯佐等具伏案此制始于景德四年

其二漢家故事真當改葉紹翁四朝聞見錄本朝廷對取士用賦荆國王安石嘗賦詩試闈中云云及當國遂以三經取士罷詞賦廷對始用策先是葉祖洽夢神人許之爲狀頭惟指庭下竹一束謂之曰用此則爲狀元葉不解其意及用策取士葉果爲首竹一束乃策定數如

此詞賦旣罷而士之所習者皆三經所謂三經者又非
聖人之意惟用安石之說以增廣之各有套括于是士
皆不知故典亦不能應制詰駢儷選蔡京患之又不欲
更熙寧之制于是始設詞學科試以制表取其能駢儷
試以銘序取其記故典自南渡以後始復詞賦羣書考
索後集元祐八年三月中書省言進士御試答策多繫
在外準備之文工拙不甚相遠難于考校祖宗舊制御
試進士賦詩論三題施行已遠前後得人不少況今朝
廷現行文字多繫聲律對偶非學問該洽不能成章取
到國子監狀太學見管生員二千一百七十五人丙二
千九十三人習詩賦八十二人習經義不兼詩賦以出

可見中外學者習詩賦人數極多詔來年御試將詩賦舉人復試三題經義舉人且令試策此後全試三題案聞見錄晁以道言神宗晚年厭薄代言之臣思復辭賦嗚呼詆詞賦爲倡優其弊至于懵然不辨菽麥其虐至于私習詩賦杖一百取約束而紛更之亦奚爲哉

奉酬聖從待制

復道諫書嘗滿篋宋史何郊傳轉殿中

侍御史言事無所避徧歷三院

侍御史爲臺端殿中侍御史爲殿院監察爲察

院有直聲晚節頗回畏因地震言陰盛臣強以譏切韓琦又乞召還王陶以迎合上意由是聲名損于御史時也東都事略郊擢侍御史知雜上疏言宰相陳執中寡學術參知政事丁度輕脫樞密使夏竦回佞皆不協人

望不當在此位劾內官楊懷敏罪章累上而懷敏未去
鄴言不已仁宗正色曰古之諫臣常有碎首者卿能行
此否鄴曰古者諫不行言不聽故臣有碎首今陛下從
諫如流何用此舉必若碎首龍墀則美歸于臣子而過
在君上臣不忍爲也仁宗悅懷敏遂斥去方是時諫官
有進姦言者以賊之根本起于皇后閣意欲傾中宮以
進貴妃且言貴妃有扈蹕之功鄴曰此必姦邪之人欲
陷皇后願陛下詳察仁宗悟鄴由是名重朝廷又言郭
承祐不當爲宣徽使張堯佐不當爲三司使居職二年
以親老乞郡案詩所云諫書滿篋者大略如此

次韻吳仲庶省中畫壁李注官制行兩省諸廳照壁自

僕射而下皆郭熙畫樹石案此語雖本石林燕語考揮
麈前錄郭熙畫山水名盛昭陵時嘗爲翰林院待詔熙
寧初其子思登進士第至龍圖閣直學士更帥三路旣
貴廣以金帛收贖熙之遺筆以藏于家由是熙之畫人
間絕少據彼文則熙乃仁宗時畫師不應于元豐官制
已行之後猶僕僕爲此役也石林所說者恐誤宋史吳
中復傳官止于熙寧時其與介甫唱酬在仁宗世新省
畫壁雖介甫亦未之見矣李注引此尤誤

和仲庶池州齊山畫圖一統志齊山在池州府貴池縣
南三里

和祖擇之登紫微閣聞見錄祖無擇字擇之蔡州人嘉